





ՎԻՄԱԳԻՐ ՄԱՍՈՒՆՔՆԵՐ

Վիմագիր արձանագրությունները մեր ժողովրդի քաղաքական, տնտեսական պատմության, հոգևոր, մշակութային կյանքի, ազատագրական ոգորումների, դավանական ընդվզումների, իրավական, իմաստասիրական ըմբռնումների, շինարարական ձեռնարկումների, վարչա-կառավարչական դրրվածքի, պարտույթների, թագավորների, նախարարների, կաթողիկոսների գործունեության, ազգի բարոյական նկարագրի ամենահավաստի ու արժանահավատ սկզբնաղբյուրներն են և դրանով էլ՝ արժանի հատուկ հոգածության: Այս նկատառումով, անշուշտ, որոշակի հետաքրքրություն են ներկայացնում նաև Էջմիածնի հոգևոր կենտրոնի տարածքի մշակութային արժեքների որմերին ակոսված տարածամանակյա վիմագիր հիշատակագրությունները, որոնց մի փոքր մասը, առիթների բերումով, հրատարակվել ու մատուցվել են հետաքրքրախույզ բանասերներին (Հ. Շահխաթունյանց, Գ. Հովսեփյանց, Ս. Բարխուդարյան և այլք), որոնց ստորև անդրադառնալու հարկ չկա: Այսու, կան բազում անտիպ վիմագրեր, որոնք զգալի կարևորություն ունեն բուն Էջմիածնում տեղի ունեցած որոշ իրադարձությունների ու եղելությունների, շինարարական-նորոգչական գործերի, Սփյուռքի ու Մայր Եկեղեցու փոխհարաբերությունների ստուգապատումը շարահյուսելու իմաստով: Այդպիսիք՝ հետազոտողներին անհայտ արձանագրություններ կան իմ հավաքածոյում, որոնք, այլազան մղումներով, հավաքել են տասնամյակների ընթացքում՝ թեև դրանք բոլորն անխտիր հրատարակելու դույզն ինչ նպատակ չունենալով: Սակայն այդ մտքին ինձ մղեց անակնկալ մի դիպված: Սրտացավ ու ողջամիտ մարդիկ տեղեկացրին, թե Զվարթնոց թաղամասում ի հայտ է եկել մի խաչքար, որի ատաղձը մոլորյալները համարել են թանկարժեք քար և, գայթակղվելով, միտք է հղացվել մասնատել ու վաճառել այն: Դիտարկումից պարզվեց, որ, հիրավի, առկա է թանկագինը, սակայն ոչ թե քարը, այլ նրա վրա պահ տրված հիշատակագիրը՝ պատմական եզակի մի վավերագիր, որը կորսվել է «անփույթ» դիտավորությամբ ու վերագտնվել պատահական դիպվածով:



Էջմիածին. Մայր Տաճարի Զանգակատան հարավային ճակատին՝ Գրիգոր Լուսավորչի բարձրաքանդակը


Նարնջագույն մարմարե հարթ երեսակալը, որի վրա փորված է խաչ և արձանագրություն, երկար տարիներ պահվել է ծածուկ (բայց խնամքով)՝ իբրև պապերից ավանդված սուրբ մատույն ու հմայիլ: Պրպտումների շնորհիվ, բարեբախտաբար, պարզվեց «խաչքարի» (և շինարարական մի ընդարձակ վկայագրի, որի մասին ևս խոսք կլինի ստորև) նախնական տեղը. այն ի սկզբանե ագուցված է եղել Էջմիածնի Մայր Տաճարի արևելյան պատի մեջ, արտաքուստ՝ ինչի մասին հավաստում է միաբանության բանիբունանդամ, ջանադիր տեղագիր Հովհաննես Ծախաթունյանցը: Մտորելով, թե՛ հնարավոր է, որ մնացյալ նշխարներին ևս մի օր կարող է վիճակվել նույնափսի դառը ճակատագիր ու անհետ կկորչեն հոգևոր կենտրոնի չփաստագրված մատույնները, խոհեմ համարեցի հրատարակել ձեռքիս տակ եղած վիմագրերը՝ դրանք գիտական շրջանառության մեջ ներգրավելու և հե-



Զարմաշի փայտե քանդակ

տագա մնայունություն շնորհելու մտադրությամբ: Ուստի **չպիտի** հանդուրժել, որ վիմական արձանագրությունների և դրանք կրող մշակութային արժեքների վրա նստի մոռացումի ջաղջ փռչում:

Նկատի ունենալով, որ ներկայացվող վիմագրերը լուրջ մի շինության չեն առնչվում և իմաստային կապով հանգուցված չեն միմյանց, ուստի դրանք տրվում են դյուրությամբ գտնելու ելակետով՝ զանց առնելով անգամ ժամանակագրական հաջորդականությունը, որը, տվյալ պարագայում, որևէ կարևորություն չունի: Վիմագրերի մի մասը **տեղաձուլված** են, մի մասը՝ **եկվորներ**, որոնք կրող խաչքարերը բերվել են այլուստ՝ վերջնական ոչըն-



Սողի կոթողի տեսքն արևելքից

շացումից փրկելու, նրանց ապահովության ու ցուցադրության բարեամտությանը:

Հետ այսու նպատակահարմար գտա խմբավորել Ղուկաս Կաթողիկոսին վերաբերող հիշատակությունները, որոնք հանդիսանում են սույն հոդվածի երևան գալու շարժառիթը:

Հաղորդման բուն շարադրանքն սկսենք «նորահայտ խաչքարի» ($0,46 \times 0,42 \times 0,05$) արձանագրությամբ: Այն փոքր գլխատառերով, գեղագիր կապգրերով, բանաստեղծական շնչով համակված ձոն է՝ ցիտված խաչակրթունքի տակ:

ՌՄԼԳ (1784): /

Ս[ՈՒՐ]Բ ԽԱԶՍ ԱՍՏԷՆ ԱՐՁԱՆ ԴՆԻ,
ՄԻՋՆՈՐԴ ԱՌ Տ[Է]ՐԸՆ ՀԱՄԱՅՆԻ,
Վ[ԱՍ]Ն ՂՈՒԿԱՍՈՒ Հ[Ա]ՅՐ[Ա]Պ[Ե]ՏԻ,
Ս[ՈՒՐ]Բ ՏԱԾԱՐԻՍ ԲԱԶՄԱՇԽԱՏԻ,
ԶՈՐ Ի ՆԵՐՔՈՒՍՏ ԵՒ ՅԱՐՏԱՔՈՒՍՏ
ՇՔԵՂԱՇՈՒՔ ՆՈՐՈԳՈՂԻ:

Սա, պետք է ասել, Ղուկաս Կարնեցի Կաթողիկոսի (1780—1799) գահակալության առաջին տարիների գործունեության հակիրճ տեղեկատվությունն է: Սակայն, իրավն ասած, բնավ զորու չէի լինի կռահել, թե խոսքը ո՞ր տաճարին է վերաբերվում, եթե, ինչպես ակնարկեցի վերևում, չլինեք Շահխաթունյանցի անվրեպ հավաստիացումը¹: Հարց է ծագում, թե երբ և ինչու է պատից դուրս ձգվել-տեղահանվել խաչքարը: Կարծում եմ այն միջոցում, երբ 1869 թ. Գևորգ Դ Կոստանդնուպոլսեցի Քերեստենյանը (1866—1881) Մայր Տաճարին արևելքից հավելակցում է մի անշուք շինություն (որը վերածվեց թանգարանի)՝ աղարտելով եկեղեցու ծավալա-տարածական սլացիկ կերպարը, խաթարելով ընկալման ողջ հմայքը մոտեցման հիմնական ուղուց: Եվ ոչ միայն խաչքարը, այլ նաև նրա տակ ագուցված համաժամանակյա խոշոր սալաքարը, որի ընդարձակ տարեգրությունը առարկայացնում-կոնկրետացնում է հուշագրությունը պոկողներից շուրջ ինը տասնամյակ առաջ մի այլ կոստանդնուպոլսաբնակ հաղորդու նյութական սատարությամբ կատարված նորոգությունները: Յավոք, թերևս պատմական արժեքին հասու չլինելու հետևանքով, այդ վեմը—կոտրտված, թերատված, անխնամ, այժմ ընկած է հյուսիսային պարսպապատի մերձակցությամբ՝ կարոտ հոգատար ձեռքի: Ու թեև արձանագրությունը չի սպրդել հոգեշան Հ. Շահխաթունյանցի աչքից, սակայն նպատակահարմար գտա վերահրատարակել այն՝ տալով նաև ներկա վիճակի գրչանկարն ու կատարելով անհրաժեշտ շտկումներ:

I ՕԳՆԱԿԱՆՈՒ[ԹԵԱՄ]ԲՆ Ա[ՍՏՈՒԾՈ]Յ ՆՈՐՈԳԵՅԱՆ
II ՆԵՐՔՆԱՇԱՐԵԱՂ ԶՈՐՔ ԿԱՐԳ
III ՔԱՐԻՆՔՍ ԲՈՂՈՐ ՈՐՄՈՅ ԼՈՒՍԱ-
IV ՆԿԱՐ ՍՐԲ[Ո]Յ ՏԱԾԱՐԻՍ ՀՈԳԱԲԱՐ-

¹ Այս և հաջորդ տեղեկությունների մասին հանգամանորեն տե՛ս Յովհաննէս Էպիսկ. Շահխաթունեանց, Ստորագրութիւն Կաթողիկէ Էջմիածնի և հինգ գաւառացն Արարատայ, հատոր Ա, Էջմիածին, 1842, էջ 35—37:

- V ՁՈՒԹ[ԵԱՄ]Բ Տ[ԵԱՌ]Ն ՂՈՒԿԱՍՈՒ ՍՐԲ[Ա]Զ[ԱՆ]
 VI Կ[Ա]ԹՈՒՂ[Ի]Կ[Ո]ՍԻՆ ԱՄ[ԵՆԱՅՆ] ՀԱՅՈՑ, ԱՐ[ԴԵԱՄ]Բ
 VII ԱԿՆԱՅ ԱՊՈՒԶԵԽ[ՑԻ ԵԻ Ի ԿՈ]Ս-
 VIII ՏԱՆԴՆՈՒՊՈ[ԼԻՍ ԲՆԱԿԵ]ԱԼ, Ի Ք[ՐԻՍՏՈ]Ս
 IX ՀԱՆԳՈՒ[ՑԵ]ԱԼ [Մ]Ա[Հ]Տ[Ե]ՍԻ Ա[ՍՏՈՒԱ]ԾԱ-
 X [ՏՈՒ]Ր ԱՂԱՅԻ ՈՐԴԻ ԲԱՐԵ-
 XI ՊԱՇՏ Մ[Ա]Հ[ՏԵՍ]Ի ՅԱՐՈՒԹԻ[ԻՆ] ԱՄԻ-
 XII ՐԱՅԻՆ, Ի ՅԻՇ[Ա]Տ[Ա]Կ ԻՆՔԵԱՆ ԵԻ
 XIII ԾՆՈՂԱՅՆ ԵԻ ՈՐԴՈՅՆ ԻԻ-
 XIV ՐՈՅ Մ[Ա]Հ[ՏԵՍ]Ի ՅՈՎՀԱՆՆԻՍԻՆ ԵԻ
 XV ԱՅԼ ԱՄ[ԵՆԱՅՆ] ԻԻՐԱՅՆ[Ո]ՅՆ: ԹՎ. ՌՄԼԳ (1784):

Վավերագիրը, այսպիսով, տեղեկացնում է, որ Մայր Տաճարն արտա-
 քինից շրջանցող վարի չորս շարքերը (**ներքնաշարեալ չորք կարգ քարինքս
 բոլոր որմոց**), որոնք պահպանվում են ցայժմ, արվել է Ակնա Ապուշեխցի՝
 Կ. Պոլսում վերաբնակված ու մեռած (ո՛վ մեզ չլքող դառը՝ հայու ճակա-
 տագիր) Աստվածատուր աղայի որդի, բարձրաստիճան ամիրա տիտղոսով
 օժտված, բարեպաշտ մահտեսի Հարությունի **արդեամբ** (դրամական միջոց-
 ներով): Ղուկաս Կարնեցին, Շահխաթունյանցի տեղեկատվությամբ, սրան-
 ցից զատ, «նորոգեցաւ սրբոյ Տաճարիս շուրջանակի սալայատակքն», ինչ-
 պես և «խախտեալ գերկուս սինս»՝ մինչև վերին կամարները³: Ինչպես
 տեսնում ենք, Սիմեոն Երևանցու (1763—1780) ձեռնարկած շինարարական
 ճկքը շարունակվեց Ղուկասի հովվապետության տարիներին: Ու թեև նա
 (ինչը վկայում է Գալանեի նախագավթում գտնվող սրտառուչ տապանա-
 գիրը)՝ **այր խոհական ու մեծ գիտնական, հանուրց Հայոց պատրիարքը դառն
 ամանակին (= ժամանակին) դիպեցաւ**, սակայն ջանադրությամբ հաջողեց

Շքեղագարդել զգահն հրաշալի,
 Որ և ետ ծաղկել կարի սխրալի,
 Զմէջ տաճարին Միածնամիջի,
 Շինեալ և զայլ շէնս՝ որք են իսկ յայտնի⁴:

Հիրավի պարապ խոսքեր չեն շնայված ականավոր հովվապետի հասցեին:
 Մասնավորաբար կարևորում են Տաճարի ներսը **ծաղկելու** մասին հավատ-
 ւումը: Շահխաթունյանցը այս առթիվ մակաբերում է, թե սվաղվում է ան-
 տումը: «գորմունս և զառաստաղն» ու դրանք պատվում են «բազմատեսակ
 գեղեցիկ նկարուք և խորհրդաւոր պատկերօք»: Եվ որ չափազանց ուշա-
 գրավ է, այս ձեռնարկումն իրագործվել է «ի ձեռն հանճարաւոր արհեստա-

² Կենսունակ ու աշխույժ Ապուշեխ (Աբուշեխ) գյուղը գտնվում էր Արևմտյան Հայաս-
 տանում, Ակն քաղաքից ոչ հեռու, համանուն լեռան ստորոտում, որը զոհ գնաց Մեծ եղեռ-
 նին:

³ Նույն հատվածները նորոգել են նաև Աստվածատուր Համադանցին 1720-ին, Սիմեոն
 Երևանցին 1777-ին, ինչպես և հետագայում ու նաև՝ 1950—1970-ական թվ., ինչը ակնհայ-
 տաբար վկայում է շինվածքի խոցելի կողմերի մասին, որը հետևանք է թմբուկի բեռան
 ծանրության, ներգետնյա ջրերի վտանգավոր մակարդակի և, հարկավ, կրկնվող երկրա-
 շարժերի:

⁴ Հ. Շահխաթունյանց, անդ, էջ 277, 280:

գէտ նկարիչն Յովնաթանու, որն էր Կովկասում ակնառու հռչակ նվաճած Հակոբ Հովնաթանի որդի Հովնաթան Հովնաթանյանը:

Հիշատակվածներից բացի, բանիբուն Հայրապետը 1788-ին նորոգում և նոր բաժանմունքներով լրացնում է 1713-ին Աղեքսանդր Զուղայեցու շինած սեղանատունը, իսկ 1790-ին, Նոր Զուղայեցի Խաչիկ իշխանի գումարներով կառուցում է Հռիփսիմեի Զանգակատունը: Տքնաջան, բեղուն, միաբանությանը բազում ջանիվ սատարող Պատրիարքի մասին խոսքս ավարտում եմ մի անտիպ վիմագրով, որը կաբմբաներկով տուֆակերտ փոքր խաչքարի վրա է՝ հագցված Տնտեսատան հյուսիսային պատի արևելյան թևում. Տ[Է]Ր Ա[ՍՏՈՒԱ]Ծ/ Յ[ԻՍՈՒ]Ս Ք[ՐԻՍՏՈ]Ս:/ ՌՄԼԵ (1786). /ԿԱՌՈՒՑԱԻ Ս[ՈՒՐ]Բ ԽԱԶԱՐՁԱՆ/ ՅԻՇ[Ա]Տ[Ա]Կ ՂՈՒԿԱՍ Կ[Ա]Թ[Ո]-Ղ[Ի]Կ[Ո]ՍԻՆ:

Այսպիսիք են Ղուկաս վեհապետի գործունեությանն աղերսվող վիմագիր մասունքները: Դրանք ևս ազդարարն են այն բանի, որ XVIII դ. թուրք-պարսկական հրոսումների և սադրանքների ծանրագին ժամանակներում, համբավ կոած Սիմեոն Երևանցուն հաջորդած Ղուկաս Կարնեցին բացառիկ եռանդ, տոկունություն ու խոհեմություն դրսևորեց առաջ մղելու Էջմիածնի հոգևոր կենտրոնի շենացման ու ամրապնդման գործը, վառ պահելու Լուսավորչի կայծկլտացող կանթեղը:

Ի դեպ, Հայաստանի պետական պատկերասրահի զետեղարանում պահվում է Վեհապետին ընծայաբերված, խնամքով ու ճաշակով ձևավորված բազմակտոր մի սպասք, որի պնակներից մեկի վրա փակագրով դրոշմված է. ՂՈՒԿԱՍ ԿԱԹՈՂԻԿՈՍ: Ենթադրվում է, որ այն բերել է Վրդանես վարդապետ Աշտարակեցին Դաքայից կամ Կալկաթայից, որն այդ տարիներին՝ 1790-ակ. թվ. պաշտոնավարում էր Հնդկաստանում՝ որպես Էջմիածնի պատվիրակ՝ ընտրված Ղուկասի կողմից:

Դառնանք **նորահայտ** մնացյալ վիմագիր նշմարներին:

Աստվածատուր Համադանցու կողմից **ի վայելումն սբ Էջմիածնա միաբանիցն ՌԾԿԷ** (1718) թվ. կառուցած տնտեսատան հյուսիսային պատի մեջ ներփակված խաչքարերի հիշատակագրությունները.

Ա.) Արևելյան դռնից աջ, կոթունաթևից վեր ձգվող բուսանյութերով, խորանի հիմնական և կողերի փոքր խաչերով կոթողի վրա.

Ս[ՈՒՐ]Բ ԽԱԶՍ ԲԱՐԷԽԱԻՍ ՍԱՌԱՅԻՆ. ԹՎ. Զ (1451):

Բ.) Ս[ՈՒՐ]Բ ԽԱ[Զ]Ս ԲԱՐԷԽԱԻՍ ՄԱՐԾԱՆԻՆ ԵՒ ԱԼՔՈՒԱՆԻՆ (?): Խաչաթևի տակ, ելնդատառ. ԹՎ. ԶԽԳ (1494). / ԱՇԷԻՆ Յ[Ի]-Շ[ԷՑԷ]Ք:

Վերջինս խաչքարագործ վարպետն է:

Գ.) Շինարձանագրությանը մերձ

ԽԱԶ[Ս] ԲԱՐԷԽԱ[Ի]Ս ԽԱԹՈՒՆԻՆ (XVI դ.):

Մայր Տաճարից Զանգակատան երկրորդ հարկ տանող դռան մոտ, հյուսկեն խաչաքանդակի թևերի մեջ, ուռուցիկ գրերով. ԹՎ. ՌՂ (1641): Նույն մուտքի մոտ, երկաթե շրջանակի տակ (որի պատճառով լրիվ չի ընթերցվել). ԿԵՍԱՐԱՅԻ Ա[ՍՏՈՒԱ]ԾԱՏՈՒՐ, / ՈՐ ՍԱ Է ԼՈՒՍԱՐԱՐ

Ս[ՈՒՐ]Բ ԷԶՄԻԱԾՆԻ/.... ԶԻՍ ԻԾ-/ ԵՅԷՔ. ՅԻՇԵԱԼ [ԵՂ]Ի[ՅԻ]Ք Ի
Ք[ՐԻՍՏՈՍ]Է. ԱՄԷՆ:

Զանգակատան ճակտոններից հյուսիսայինում թագակիր Տրդատ Մեծի (298—330), արևմուտքում՝ Հիսուսի, հարավում՝ խույրով Գրիգոր Լուսավորչի պատկերաքանդակներին հարակից. ՏՐԴԱՏ (փակագիր), Յ[ԻՍՈՒ]Ս Ք[ՐԻՍՏՈ]Ս, Ս[ՈՒՐ]Բ ԳՐԻ/ԳՈՐ ԼՈՒՍ[Ա]Ի[Ո]ՐԻԶ: Դավանա-գաղափարախոսական բուն իրադարձություններից 1355 տարի անց արվեստագետի կերպարանավորած թագավորը հանդես է գալիս խաչաքարձ գավազանով, Լուսավորիչը՝ Ավետարանով և, օրհնելու համար, աջը վեր պարզած:

Թևավոր խաչքար.—Հայերը քառաթև-թևավոր քարակերտ խաչեր են գործածել վաղնջական ժամանակներից՝ IV դ. սկսյալ՝ իբրև հավատո հանգանակներ ու տերունական խաչի սուրբ նշաններ (Ագաթանգեղոս): Դրանց կիրառումը շարունակվել է նաև հետագա դարերում, որոնցից մի հոծ խումբ այժմ էլ կա Հյուսիսային Հայաստանի երկայնքով մեկ՝ Աշոցք-Գուգարք-Տավուշ-Ուտիք-Արցախ ուղեգծում: Դրանց լավագույն նմուշներից երկուսը հանգրվանել են Էջմիածնում. մեկը Խամշի վանքից է (1633 թ.), մյուսը՝ Հովհաննավանքից: Վերջինս կոտրտվել, 12 կտորի է վերածվել 1840 թ. երկրաշարժի հարվածից: Կտորտանքները հավաքել ու Էջմիածին է տեղափոխել հանգուցյալ Կոմիտաս սրբազանը 1976 թ.: Տարանջատ բեկորները համադրել ու ամբողջացրել է ճարտարապետ Հակոբը: Խաչքարն այժմ տեղադրված է Նոր Վեհարանի հյուսիսային թևում: Այն պսակված է գեղարվեստական բարձր ճաշակով և գաղափարական հագեցվածությամբ. անն ու դրան նպաստավորող երևույթները խորհրդանշող գաղափարախոս կոնդարմանից ծլում-փթթում է խաչածառը՝ ոչ պատահաբար մարդկության սերմնահատիկ Ադամի հարակցությամբ: Իսկ խաչաքառին Փրկչի, կողաթևերին՝ քրիստոնեության գաղափարախոսներ Պողոս և Պետրոս ավետարանիչների պատկերաքանդակներն են՝ ներփակված ոսկեքշան մեղալիոնների մեջ: Խաչահատույթի ական տեղում ասեք լուսաստղի պես կաշծկտում է հավասարաթև խաչը: Կարևոր է նաև, անշուշտ, որ այս եզակի մտահղացման վրա դրոշմված է կերտողի՝ Վարդանի անունը: Վարպետը Եղվարդեցի է, ուր հորինել է մի շարք խաչքարեր ու տապանաքարեր, որին պետք է դասել XII դ. երկրորդ կեսի նշանավոր արվեստագետների շարքը: Անկրկնելի կոմպոզիցիայով ու թեմատիկայով, ճարտար զարդարվեստով կոթողի արձանագրությունը, վերից-վար, հետևյալն է. Յ[ԻՍՈՒ]Ս Ք[ՐԻՍՏՈ]Ս:/ ՊԱԻՂ[ՈՍ] ՊԷՏ[ՐՈՍ]:/ ԱԴԱՄ:/ ԵՍ՝ ՄԵՂՈՒՅԵԱԼ ՎԱՐԴԱՆ, ԿԱՆԿԷՑԻ ԶՆՇԱՆԱՆԻՍ ԻՄՈՎ ԶԵՌԱՄԲ՝ Ի ԲԱՐԷԽԱԻՍ ԻՆԶ:/ Ի [ԹՎ.] ՈՒ (1171):

Այրիվանքից Էջմիածին բերված խաչքարերից մեկը, որը տեղակայված է Տրդատամուտքից Վեհարան տանող սալուղու աջ թևում, ստորին մասում ունի հետևյալ մանրագիր արձանագրությունը. ԿԱՆԿՆԵՑԱ/Ի ԽԱԶՍ Ի/ ԲԱՐԷԽԱ/ԻՍՈՒԹԻ[ԻՆ] Գ/ՐԻ[ԳՈ]ՐԻ Վ[ԱՐ]ԴԱՊԵՏԻ. ՈՐՔ ԵՐԿԻՐՊԱ-ԳԱՆԷՔ ՅԻՇԷՍ/ԶԻ[Ք] Ի Ք[ՐԻՍՏՈ]Ս, ԸՆԴ ՆՄԻՆ ԵՒ ԶՈՀԱՆՆԷՍ ԿԱԶՄՈՂ ԵՒ/ ԶՄԷՀՐ[ԱՊ],/ ԶԻԳՆԱ[ՏԻՈ]Ս, ԶԱԲՐ[ԱՀ]ԱՄ ԵՒ ԶԱ/ԹԱՆԱՍ ԱՇ/ԽԱՏ[ԱԻ]ՈՐՔ:

Այրիվանքում գործել են մի քանի Գրիգոր վարդապետներ ու վանահայրեր, որոնց որքությունն ու ժամանակն իրապես պարզված է: Հայտնի չէ սակայն, թե երբ է մահացել և դին ուր է ամփոփվել XII դ. 70—80-ակ. թվ.

վանքի առաջնորդ Գրիգորը⁵: Կարծում եմ, այս խաչքարը ճորիմվել է ի հիշատակ ժամանակի մեծատոհմիկ անաճնց և Աղվանից Ստեփանոս կաթողիկոսի հետ սերտ կապեր ունեցող ականավոր վարդապետի՝ որի անշունատեղն այլևս կմնա անհայտ:

Արձանագրությունը տեղեկացնում է, որ խաչքարը կազմել-նախագծելու քանդակել է Հովհաննեսը, իսկ մնացյալ աշխատավորներից հակված եմ Աբրահամին նույնացնել գլխավոր եկեղեցու վիմագրերից մեկում հիշված մեկենասին⁶, Աթանասին՝ Գեղարդում գրված մի ձեռագրի հիշատակարանում հանդես եկող փակակալին, Իգնատիոսին՝ Հավուց Թառում գործող գրչին: Մեհրապն էլ, թերևս, քարհատն է: Նման՝ խմբական ուժերով խաչքար շինելու սովորույթը եզակի դեպք չէր միջնադարում, թեև երբեք ոչ այսքան ներկայացուցչական:

Գեղարդակնունք չորս այլ խաչքարեր ևս ունեն հիշատակագրություններ, որոնցից մեկը տեղադրված է նախորդի շարքում: Տհաս ու անսիրտ նորոգողները տաշել են քիվը՝ պատի հարթությունը հավասարեցնելու համար, ուր, անշուշտ, դրվագված է եղել ննջեցյալի բարեխոսության վկայախոսքը: Արվեստի բարձր համարում ունեցող այս կոթողի մանրանկարային շքեղությունն ու ինքնատիպությունը բացորոշ վկայում են, որ այն պետք է վերաբերվի շնորհաձիր վանահորը կամ գրիչ-ծաղկողներից որևէ մեկին: Չարական ձեռքից փրկվել է հարավային կողի անձնանունը՝ ՏԻՐԱՆ/ՈՒՆ, որը, հավանաբար, քանդակագործն է:

Երկրորդ խաչքարը նույնպես կանգնեցված է միևնույն շարքում, առաջին դասում: Կենաց ծառի դրսևորումներով՝ վեր մագլցող շուշանաձաղիկների փարթամագեղ ոստերով հրաշակերտ կոթողի աջ կողը կտրել են երկայնքով մեկ, պատի թանձրության համեմատ և այն գործադրել որպես մուտքի փակակալ: Դրա հետևանքով թերատվել է նաև թիկունքի արձանագրությունը, որը լրացնում եմ մտքի զորությամբ՝ թվից զատ. ...[Թ]ՎԻՍ, ԵՄՍՏԵՓԱՆՆ/[ՈՍ ԿԱՆ]ԳՆԵՅԻ ԶՍ[ՈՒՐ]Բ ՆՇԱՆՍ/[Ի ԲԱՐԵ]ԽԱԽՍՈՒԹԻ[ԻՆ] ԻՆԶ ԵԻ ԵՂ/[ԲԱՐՑ Ի]ՄՈՑ ՀԱՄԱԶԱ/[ՍՊԻ], ՈՎԱՆՆԻՍԻ/[ԵԻ Պ]ԵՏՐՈՍԻ: Ամենայն հավանականությամբ Ստեփաննոսը, յուր եղբայր Պետրոսը և Համագասպը Գեղարդի կաթողիկեի արևելյան պատի արձանագրության մեջ հիշված անիճնք են, որոնք ութ դահեկան են նվիրել և չորս պատարագաժամ ստացել⁷: Քանի որ նպաստավորումը եղել է շինարարության ընթացքում, ուստի նրանք XIII դ. երկրորդ տասնամյակի գործիչներ են:

Մյուս խաչքարը շրջապարսպի հյուսիսային պատի տակ է. ԵՄՄԱՐՏԻՐՈՍ, ԿԱՆԳՆԵՅԻ/ ԶԽԱԶՍ Ի ԲԱՐԵԽԱԽՍՈՒԹԻ[ԻՆ]/ ՆԵՐՍԻՍԻ ԵԻ ՏԻՐԱՑ/ՈՒ/ԻՆ: Չի բացառվում, որ հիշատակվածը Աղջոց վանքի առաջնորդ Տիրացու վարդապետը⁸ լինի (1234 թ.):

Հաջորդ խաչքարը կանգնած է Հին Վեհարանի բակում, որի հարավային կողին փորագրված է. [ՎԱ]Ս[Ն] ԽԱԹ/[ՈՒ]ՆԱ Է / ԽԱԶՍ, / ՅԷՍՄ/

⁵ Գաբեգին արքեպ. Հովսեփյան, Խաղբակյանք կամ Պոռչյանք հալոց պատմության մեջ, մասն Բ, Երուսաղեմ, 1942, էջ 54—55, 90:

⁶ Նույնի հատոր Գ, Նիւ Եորք, 1942/3, էջ 43:

⁷ Նույն տեղում, էջ 52: Պետրոսը թաղված է Աղջոց վանքում. խաչքարի (108×0,71×0,20) խորանում գրված է. ՈԿԴ (1215)./ ՊԵՏՐՈՍ ՅԻՇ/ԵՅԷՔ Ի Ք[Ր]ԻՍ[Տ]/ՈՍ:

⁸ Նույն տեղում, էջ 68:

ԿԱՆՆ/ ԵՒ ՊԱՊ/ԵՐՈՅՆ: / ՈԿԵ (1216) Թ. / ՅԻՇ[ԵՅԷՔ]: Ոմն Յեսմիկ, սրանից քիչ առաջ, մեկ պատարագածամ է ստացել Գեղարդավանքում⁹, բայց տարակուսում եմ, արդյո՞ք նույն անձն է:

Էջմիածնի շրջապարսպի գլխավոր մուտքի մերձ, ներքուստ, ցայտաղբյուրի մոտ տեղադրված խաչքարը բերվել է Գթաշեն բնակատեղիից (Մաքենյաց վանքից ոչ հեռու): Եռանկյունի ճակատաքիվին ակոսավոր վերնազգեստով Մարիամի և Հիսուսի, չորս ավետարանիչների խորհրդանշանների, արևի ու լուսնի հարթաքանդակներն են՝ մակագրությամբ: Դրանք, ինչպես և ստորին եզրի խոշոր թվատառերը, ուռուցիկ են՝ խաչքարը կանգնեցնելու շարժանիթի չափազանց ուշագրավ վավերագիրը հարավային կողին և թիկունքին է, որը հրատարակվել է թերի, սխալներով, առանց մեկնաբանման փորձի և նկատվել է, թե թվական չունի¹⁰, որը պարզապես սպրդել է հրատարակիչների աչքից: Ամբողջական արձանագրությունն ունի հետևյալ պատկերը.

Արևմտյան ճակատին՝ Տ[Է]Ր Ա[ՍՏՈՒԱ.]Ծ/
Յ[ԻՍՈՒ]Ս Ք[ՐԻՍՏՈ]Ս: Տ[Է]Ր ԴԱԻԻԹ:/
Թ/Վ./ Ռ/Ժ/Ը (1569):

Հարավային կողին՝ ԴԱԻԻ/Դ ԷՐԷՅ/ ԿԱՆԿՆԵ/ՅԱՔ Խ/ԱԶԵՐ/Ս ԲԱ-
ՐԵ/ԽԱԻՍ ՄԵ/Զ, ՀԱԻՐ/ ՄԵՐ ՍԱԻ/ԼԴԱՆՂ/ՈՒԼԻՆ¹¹:

Թիկունքին՝ Ա[ՍՏՈՒԾՈ]Վ ՄԵՔ՝ ԴԱԻ/ԻԹ ԷՐԷՅՍ :Ե:(5) ՈՐԴԻՔՍ,
ՍԱԻԼԹԱՆ/ՂՈՒԼԻՆ, ԵՂԻՇԻՆ ԹՈՌ/Ն ՂԱԼԱՄԻՆ, ՈՐ ԵՆՔ/
ԾՆՈՒՆԴ ՍԱՐՈՒ ԱՄԻՐ/ՃԱՆԻՆ, ՈՐ ԲԱԶՈՒՄ ԶԱՆ/ԻԻ ԵՒ
ՀՆԱՐԻԻ ԲԵՐԵԱԼ ՍԱ/ՐԴԱՀՆ ԱՅՊՈՒ ՍԱՐԻՆ/ ԶՈՒՐՆ Ի ԴԱՇ-
ՏԸՆ ԳԹԱՅ/ՇԻՆՈՅ, ՇԻՆԵԱՅ :Բ: (2) ԶԱ/ՂԱՅՆ, ԵԹՈՂ ՀԱ-
ՐԵՆ/ԻՔ ԻԻՐ ԾՆԸՆԴՈՅ:

Պարզվում է, որ Սարու (շեկ) Ամիրջանի ժառանգները, Դավիթ երեցի նախաձեռնությամբ, բազում ջանքերով ու հնարագիտությամբ, լեռների բարձունքների աղբյուրների ջրերը բերել-հասցրել են Գթաշենի տարածքը (**բերեալ սարդահն աչպռի սարին ջուրն**), շինել են երկու ջրաղաց և դրանք, անհատույց, նվիրել են իրենց հայրենի գյուղին:

Քառանիստ կոթող.—Եղել է Սողք ավանի (Վարդենիսի շրջան) գերեզմանոցում՝ համակերպ երեք այլ միակտուր հուշակոթողների հարակցությամբ: Դրանց մասին վկայում են Հ. Շահխաթունյանցը, Ս. Զալալյանցը, Մ. Սմբատյանցը և Ե. Լալալյանը: Վերջինս քարասյունները տեղափոխել է Կովկասյան թանգարան (Թբիլիսի): Մեկը, բարեբախտաբար, կոտրվել և թողնվել է կես ճանապարհին: Մեարովբ Տեր-Մովսեսյանը 1911 թ. այն բերել է Էջմիածին և տեղադրել ճեմարանի բակում, ուր է ցայժմ: Արձանագրության հավաստմամբ կոթողների վարպետն է **քարագործ Զոհրապը**, որի տիտղոսը Մ. Սմբատյանցը կարդացել է **չարագործ**¹², որպիսի տիման կնքադրոշ-

⁹ Նույն տեղում, էջ 42:

¹⁰ Դիվան հայ վիմարության. պրակ IV, կազմեց Ս. Գ. Բարխուդարյան, Երևան, 1973, էջ 299, № 1241:

¹¹ Էջմիածնում է նաև Սուրբանգուլիի խաչքարը:

¹² Մեարովբ արքեպիսկոպոս Սմբատեանց, Տեղագիր Գեղարքունի ծովագարդ գաւառի, Վաղարշապատ, 1895, էջ 620—621:

մում մտել է գիտական շրջանառության մեջ¹³: Բացի այս, արձանագրությունն ամբողջապես չի վերծանվել-հրամցվել ըստ հարկի, կատարվել են բնագրից բացահայտ շեղումներ ու խառնաշփոթություններ, որի հետևանքով զգալապես տուժել է իմաստը: Հիշատակագրության նորովի և ամբողջական վերծանությունը հետևյալն է. ԹՎ. ՌԾ/Բ (1653):/ ԼՆԱԻՔՆ Ա[ՍՏՈՒԾՈ]Յ ԵՄ ՈՒԼՈՒԽԱ/ՆՍ, ԵՄ՝ ՄԱԼՔ/ՈՒՄՍ, ԵՄ՝ ԳԱՍ/ԲԱՐՍ, ՈՐԴԻ[Ք] Տ[Է]/Ր ՄԵ-ԼԻՔՍԷԹԻ/Ն, ԿԱՆԿՆԵՅՈՒՅԱՔ Ս[ՈՒՐ]Բ ԽԱ/ՉՍ ԲԱՐԵԽԱ/ԻՔ Տ[Է]Ր ՄԵԼ[Ի]ՔՍԷ/ԹԻՆ, ԿՈՂԱԿՅ/ԻՆ՝ ՅԻԼԲՈՒՄԻՆ,/ ՊԱԼԻՆ, ՂԱՍՈՒՄԻ/Ն ԵՒ ՀԱՐՍՆԵՐՈՒՆ/ ԻԻՐԵԱՆՑ՝ ԵՓՐՈՅՍԻ/ՄԻՆ, ԽԱՍԼԱՐԻՆՏԻՆ:/ ԵՄ՝ ՄԵ-ՂԱՅՊԱՐՏ Ք/ԱՐԳՈՐԾ ԶՕՀՐԱՊ/Ս ԿԱՆԿՆԵՅՐ[Ի] ԶԽ/ԱՉԵՐՍ: ՈՎ Կ/ԱՐԴԱՔ ՄԵԶ ՈՂՈ/ՐՄԱԾ ԼԵՐՈՒՔ,/ Ա[ՍՏՈՒԱ]Ծ ԶԵԶ [ՈՂՈՐՄԵՍ-ՑԻ]:

Քարգործ Զոհրապի արվեստն առանձնապես գնահատելի է այն առումով, որ նա վերստին կյանքի կոչեց IV—VII դդ. հատվածավորված, թևավոր խաչավարտով կոթողների ավանդույթը՝ թեև այն հետագա լայն տարածում չստացավ:

Խաչքար.—Դիմհարած է Հին Վեհարանի կամարակապ սրահի պատին, բերված է Մաքենյաց վանքից: Հիշատակագրության թվի տասնավորն ու միավորը, ինչպես և անձնանը մնացել են աննկատ¹⁴, որոնցով ամբողջացվում է. Ա[ՍՏՈՒԾՈ]Վ ԿԱ[Ն]ԿՆԵՅ[ԱԻ] Խ[Ա]ՉՍ [Ի ԲԱՐԵԽԱԻՍՈՒԹԻՒՆ]/ ԱՍԻԼԻՆ./ ԹՎ. ԶՂ/Թ (1550):

Խաչքար (XVI դ.).—Գտնվում է նախորդի մոտ, նախնական տեղը Մաքենյաց վանքն է: Արձանագրությունը հրատարակվել է անստույգ ու թերի¹⁵, որը լրացվելով ստանում է հետևյալ պատկերը. ԵՄ՝ Դ[Ա]ԻԻԹՍ ԿԱՆԳՆԵՑԻ Ս[ՈՒՐ]Բ Խ/ԱՉՍ:/ Տ[Է]Ր Յ[ԻՍՈՒ]Ս, որից ցած՝ քիվատակին խաչելության անկաշկանդ պատկերագրությունն է:

Հին Վեհարանի բակի խաչքարերից երկուսը բերվել են Հայրավանքից: Դրանցից առաջինի քիվի հիշատակագրությունը բաց է թողնվել ամբողջովին¹⁶, իսկ մյուսը հրատարակվել է թերի¹⁷, որոնք լրացվում են դյուրավ:

Ա/ [ՍՈՒՐԲ ԽԱՉՍ Բ]ԱՐԵԽԱԻՍ ՄԿՐՏԻ[ՉԻՆ]: /ԹՎ. Զ/ԿԵ (1516):
Բ/ ԶՄԽ/ԻԹԱՐ/ [ՔԱՀԱ]Ն[Ա]Յ ՅԻՇԵ[ՑԷ]Ք, ՈՐ Տ[Է]Ր
Ա[ՍՏՈՒԱ]Ծ ՈՂՈ[ՐՄԵ]Ա:

Գլաձորի (Թանահատի) վանքից տեղահանված մի քանի խաչքարեր փութկոտ կերպով «եկել» են Էջմիածին, որոնք այժմ պահվում են Հին Վեհարանի բակում և սրահում: Դրանցից մեկը թաղված է եղել հողի մեջ, ուստի արձանագրությունը լրիվ չի կարդացվել և տեղիք է տվել թյուր եզրակացության¹⁸: Վերահրատարակվում է շտկումներով ու լրացումներով. ՈԿԴ (1215). ԵՄ՝ ՔՈՒՐԶԱՇԱՀ ԿԱՆԳՆԵՑԻ ԶԽԱՉՍ/ Ի ԲԱՐԵԽԱԻՍՈՒ-

¹³ «Դիվան», IV, էջ 333, թիվ 1353, 1354:

¹⁴ «Դիվան», IV, էջ 293, № 1218:

¹⁵ Նույն տեղում, № 1219:

¹⁶ Նույն տեղում, էջ 83, № 318:

¹⁷ Նույն տեղում, № 319:

¹⁸ Դիվան հայ վիմագրության, սրակ III, կազմեց Ա. Գ. Բարխուդարյան, Երևան, 1967, էջ 90, թիվ 250:

ԹԻ[ԻՆ] ԳՐԻ/ԳՈՐՈՒ ԵՂԲԱԻՐ ԻՄՈՅ, ՈՐ ԿԻՍԱԻՐԵԱ ՓՈ/ԽԵՑԱԻ Ի Ք[ՐԻՍՏՈ]Ս. ՈՐՔ ԸՆ/Թ[ԵՌՆՈՒՔ] ՅԻՇԵՍՋԻՔ Ի Ք[ՐԻՍՏՈ]Ս:

Խաչքարի նույն տեղում, ուղղանկյուն խորանում և խաչակոթունի տակ. ԹՎ. ՊԶԴ (1435)./ Ս[ՈՒՐ]Բ ՆՇԱՆ[Ս] Տ[Է]ՐՈՒՆԱԿԱՆ/ ԴԱԻԻԹ Ք[Ա]-Հ[ԱՆԱ]Ի[Ն] ԼԵՐ ՔԱԻԱՐԱՆ: Պարզվում է, որ այս մասունքն էլ առնված է Հաղբառի վանքից, ուր, Ջանգալատան պատի տակ, հանգչում է քահանայի անյունը¹⁹: Կարծում եմ այս և մի քանի այլ խաչքարեր, որոնց ստույգ տեղերը հայտնի են և չեն ցուցադրվում էջմիածնում, պատշաճ կլինեին վերադարձնել յուրյանց նախնական տեղերը՝ քավարան ծառայելու մեռած տերերին:

Հին Վեհարանի արևմտյան պատի մեջ տեղադրված փոքր խաչքարի քիվին. Ա[ՍՏՈՒԱ]Ծ Ո[ՂՈ]ՐՄԻ ՄԽ/ԻԹԱՐԱ, ՎԱՆԵՆԻ[Ն]:

Նույն տեղում կան նաև այլ վիմագրեր, որոնցից արժանահիշատակ եմ համարում.

Ա) Խաչքար տեղահանված, ուռուցիկ, գեղագիր փակագրով. ՅԱԿԱԻԲ ՎԱՐԴԱՊ[Ե]Տ:

Բ) Երեսապատ տուֆ քարի խաչաքանդակի մեջ. Ս[ՈՒՐ]Բ Խ[Ա]ԶՍ ԲԱՐ/ԵԽԱԻՍ Է Ն/ԱԶ/Ա/[Ն]ԻՆ, ՀԱԻԱՆԻՆ....

Գ) Բեկորներից մեկի ստորին պոնկին. [ՍՈՒՐԲ Խ]ԱԶՍ ՎԱՐՊԵՏ ՅՈՎԱՆԷՍԻՆ՝ ՆՈՐՈԳ[Ո]ՂԻ: Թե ինչ է նորոգել Հովհաննեսը՝ առանց կողմնակի աղբյուրի անկարելի է կոահել, սակայն նա XVII դ. էջմիածնում գործող վարպետներից է:

Մի վերջին դրվագ ևս: Հին Վեհարանի առաջին հարկում ակնաճանաչով խնամվում է ըստ լուրերի Արցախի Գուշավանքից (Հադրութի շրջան) բերված պատկառելի չափերով մի ճոխ խաչքար: Շքեղությամբ, երկրաչափական և բուսական զարդերի անհասանելի կատարելությամբ ու նրբությամբ, խաչի ծառացման, կենսունակությամբ, անն ու փթթումը խորհրդանշող մանրամասներով պանծալի քերթություն և այս տիպի կոթողների սակավիկ շարքում դասական նմուշ է դա: Ամենափրկիչ խաչքարերի օրինակով թևատակին երկար, ակոսավոր շրջազգեստով, երկարակրունկ մաշիկներով ծնկաչոք հրեշտակաթև ֆիգուրները ձեռքներն առաջ կարկառած ադերսանքով դիմում են շրջանակի մեջ ներփակված, գոհին բազմած Տիրոջը, որին պատվարել են երկնային աթոռի չորս հեմարան ավետարանիչները: Հիսուսից ձախ թերևս վանահայր Մաթևոս եպիսկոպոսի (խույրով), աջում՝ Գրիգոր Լուսավորչի (լուսապսակով) երկար շուրջառներով պատկերաքանդակներն են, որոնց հարակից և շրջանակին ընդելուզված ելնդատառ հիշատակագրությունները զարդոտված են և երկմտանքով կարդում եմ միայն. ՄԱԹԷ[ՈՍ] ԵՊ[ԻՍ]Կ[ՈՊՈՍ]: Ս[ՈՒՐ]Բ ԳՐԻԳ[Ո]Ր: ՀԻՆ ԱԻՈՒՐՅՆ ԵՏ ԱԴԱՄ? ԱՐԷՆ...

Հոգվածի շրջանակներում հնարավոր չէ սպառել էջմիածնի վիմագիր գանձերի մասին ասելիքը: Դա հնարավոր չէ: Ստուգապատում այդ հիշատակագրությունների գերակշիռ մասը մնում է անտիպ ու անհայտ հայագիտությանը: Դրանք հիմնականում վերաբերում են շինարարական ձեռնարկումներին, պայմանադրություններին, նվիրատվություններին, վարդապետներին, ուսրունիներին և այլն: Առանց այդ հավաստի ու եզակի վավերա-

գրերի անկարելի է հշուսել ամենայն Հայոց հոգևոր կենտրոնի լիարյուն և համակցված պատմությունը: Աղբյուրագիտական բացառիկ արժեք ունեցող այդ բազմիմաստ ու հազվադեպ մասունքները, որոնք եղծվում են դարերի և հազարամյակների ընթացքում բնական ուժերի անկանխելի ներգործությամբ, այսպասելի դիպվածների բերումով, զոհ գնում տգիտությանը, անփութությանը, չարական ձեռքին, պետք է շուտափույթ հավաքել խնամքով, վերձանել ու մեկնել մեկիկ-մեկիկ և հրատարակել գիտական արդի պահանջների համեմատ՝ ի լուր ամենեցունց:

Չպետք է հապաղել, վաղն ուշ կլինի:

ՍՈՒՐԵՆ ՍԱՂՈՒՄՅԱՆ

